

INUIT ATAQATIGIIT

Inatsisartuni



UKA20/ 79
04.11.20.
Peter Olsen

Nipilersortartut immiussinissamut aningaasartuutaannut 10.000 kr.tikillugu tapiisummik misiliutaasumik 2021-miit augustip aallaqqaataani atuutilersussamik Naalackersuisut pilersitseqqullugit Inatsisartut aalajangiiffissaattut siunnersuut. Katillugu ukiut marluk ingerlaneranni 300.000 kr.-nik aningaasalerneqassaaq, Nunatsinni nipilersukkanik saqqummersitsisarnerup siuarsarnissaanik siunertalimmik. Misilittagaalersimasut nalilersuinissamut atorneqassapput avammut tunisassiornikkut kiisalu eqqumiitsuliornikkut siuariarsimanermut sunniuteqarsimanersut.
(Inatsisartunut ilaasortaq Aqqalu C. Jerimiassen, Atassut)

Allannguutissatut siunnersuut;

Inatsisartunut ilaasortap Atassummeersup Aqqalu C. Jerimiassenip siunnersuutaanut soqutiginarluinnartumut pissanganarluinnartumullu qujalluta, matumuuna Inuit Ataqatigiinniit imatut oqaaseqaateqassaagut.

Aqqalu C. Jerimiassenip oqariartuuta siunnersuuteqarnerminullu tunngavilersuutai tamaasa naatsumik oqaatigalugit, Inuit Ataqatigiinniit ilisarisinnaalluarlugillu paasilluarsinnaavagut aamma tamaasa isumaqatigaavut.

Taamatullu oqariarluta, Naalackersuisut akissuteqaamminni oqariartuutaat aamma paasilluarpagut isumaqatigaavullu, akissumminni imatut oqariartormata, tassalu 10.000,- piviusorsioortutut isigineqarsinnaanngitsut, nalinginnaasumik nipilersortartut qinnuteqarnerminni agguaqatigiissillugu 45.000kr missaata tungaanut qinnuteqaateqartarsimmamata. Taamaattumik 10.000,-it tungaannut tapiiffiqineqarsinnaanissamik siunnersuuteqarneq piviusorsioortuunnginnera pissutigalugu itigartinneqarnissaanik innersuussuteqarlutik.

Taamaattorli uagut Inuit Ataqatigiit, Naalackersuisut ilaaginnarlugit itigartitsiinnarusunngilagut; alloriaqqikkusuppugut ingerlariaqqikkusuppugullu.

Aap, Aqqalu C. Jerimiassen paasilluarsinnaavarput, isumaqatigaarpullu nipilersortartut immiussinerminnut atatillugu tapiiffiqineqaqqulluni qinnuteqarfiusinnaasumik pilersitsisoqarnissaanik siunnersuuteqarmat. Aap aamma Naalackersuisut isumaqatigaagut oqarmata 10.000,- tungaanut tapiiffiqineqarsinnaalernissamik siunnersuut piviusorsioortuunngitsaq, taamaattumik piffissaq manna iluatsillugu uagut Inuit Ataqatigiit allannguutissamik siunnersuummik saqqummiussaqaarniarpugut.

Allannguutissatut siunnersuutiginiarpagut Aqqalu C. Jerimiassenip kisitsisit – aningaasat 10.000,-it taakkartugai 45.000,-nut qaffanneqassasut, ukiunilu marlunni 300.000,-it taakkartugai aamma 500.000,-nut qaffanneqarnissaat uagut allannguutissatut siunnersuutigerusuppagut.

Taamatut allannguutissatut siunnersuuteqarniarnitsinnut tunngavilersuutigisinnaasagut amerlangaarmata immaqa ulloq manna tamaat atorlugu tunngavilersuisinnaagaluarluta, tunngavilersuutiginiakkavut minnerpaat marluk oqaatigissavagut.

Tunngavilersuutissarput siulleg Naalakkersuisut akissuteqaamminni nammineq oqaatigereerpaat, tassalu 10.000,- annikippallaarujussuarput, agguaqatigiisillugu qinnuteqaatigineqartut tassaasimmata 45.000,- missaat.

Aappaattut; Nipilersortartut Kattuffiat aammalu nipilersortartut isumaqarput 10.000,- ajunngikkaluarput, kisianni naammangillat amerlanerujussuusariaqarput iluaqutaassappata.

Nipilersortartut ilaata immiussinissaminut atatillugu qinnuteqatigisimasaminut atatillugu aningaasartuutissatut missingersuusiani uannut assersuutissatut nassiussimavaa.

Missingersuummi takuneqarsinnaavoq immiussinerminnut ataattillugu minnerpaamik 169.000,- missaat atorfissaqartinneqassasut. Taakkunannga 63.000,- immiussisarfimmu atugassaallutik, 44.000,- nipilersortartut aningaasarsiasaannut; tumerparpaartoq, kitaarertumut bassertumullu, angalanernut 23.000,- missaat, nipigissaanissamullu 32.000,- missaat atorneqartussaassallutik.

Immiussinermi aningaasarpasut atorfissaqartinneqarput 10.000,- niinnaangitsut. Taamaattumik 10.000,- it 45.000,-mut qaffanneqarnissaat pissusissamisoorpoq, pivusorsiortuuppullu aallarniutigilluassallugit.

Tamanna pillugu allannguutissatut siunnersuutissanik marlunnik imaattunik saqqummeerusuppugut;

“Konto pingaernerup 40.95.01.-ip “Nipilersuutininik sanasarnermut tapiissutit”-it ataanni oqaasertaliussanik nutartereqqullugit Naalakkersuisut peqquneqarnissaannik inatsisartut aaliangiiffigissasut siunnersuut, taamaaliornikkut taallortut erinniortullu, immiussinerminnut atatillugu aningaasartuutissamik ilaannik matussusiinnaaleqqullugit 45.000,-it tungaannut annertussusilimmik tapiiffigineqarsinnaaleqqullugit”

Aammalu aappaattut;

Nipilersortartut immiussinissamut aningaasartuutaannut 45.000 kr. tikillugu tapiissummik misiliutaasumik 2021-miit augustip aallaqqaataani atuutilersussamik Naalakkersuisut pilersitseqqullugit Inatsisartut aalajangiiffissaattut siunnersuut. Katillugu ukiut marluk ingerlaneranni 500.000 kr.-nik aningaasalerneqassaaq, Nunatsinni nipilersukkanik saqqummersitsisarnerup siuarsarnissaanik siunertalimmik. Misilittagaalersimasut nalilersuinissamut atorneqassappat avammut tunisassiornikkut kiisalu eqqumiitsuliornikkut siuariansanermut sunniuteqarsimanersut.”

Allannguutissatut siunnersuummut siullermut tunngatillugu oqaatigisinnaavara kontop pineqartup 40.95.01.-ip iluani periarfissaqareeraluarpoq taamatut tapiiffigineqarnissamut qinnuteqassalluni, taassumalu kontop pineqartup iluani siunertamut tassunga 2020-mi 564.000,-nik aammalu 2021-mi 589.000,-nik aningaasartalerneqareerpoq, imaappoq taanna atorneqassappat immikkut ittumik aningaasaleeqqittoqartariaqanngilaq, aningaasat pioreersut atorneqarsinnaammata.

Konto taanna pineqartoq periarfissaareeraluartumik oqarama, kontop ataani tassani oqaasertaliunneqarsimasut innersuussutigisavakka. Oqaasertaliunneqarsimasuni oqaaseqatigiit siulliit imaattut issuaavigilaassavakka;

“Nipilersuutininik sanasarnermut tapiissutit: Nipilersortartut maani najugallit qinnuteqarnerisigut nipilersuusiornermut tapiissuteqartoqarsinnaavoq, matumani nutaanik nipilersuusiorneq immikkut pingaartillugu. Aammattaaq ukiup sisamararterutaata siuliani saqqummersitanut ikinnerpaamik 400-nik digitali aqqutigalugu imaluunniit CD-tut siammarterneqartussanut tapiissuteqartoqarsinnaavoq.”

Konto pineqartoq periarfissaareeraluartumik oqarninni oqaaseqatigiit siulliit uku innersuussutigisavakka; ***“Nipilersortartut maani najugallit qinnuteqarnerisigut nipilersuusiornermut tapiissuteqartoqarsinnaavoq” uteqqippara; “Nipilersortartut maani najugallit qinnuteqarnerisigut nipilersuusiornermut tapiissuteqartoqarsinnaavoq”***

Ajoraluartumilli nipilersortartorpaaluit qinnuteqaraluaangamik itigartinneqartarsimapput. Tamanna uppersarsarneqarpoq § 37 naapertorlugu apeqquteqaatigisannut Naalakkersuisut akissuteqaataanni. Apeqquteqaatiga takusiuk nr. 2020/163

2018-imi saqqummersitsiviit katillugit marluk tapiiffigineqarsimapput, taakkunanngalu ataaseq qinnuteqaatinut 19-inut agguataarlugit 523.033 kr.-nik aappaalu qinnuteqaammut ataatsimut katillugit 42.668 kr.-nik tunineqarput.

2019-imi saqqummersitsiviit katillugit pingasut tapiiffigineqarsimapput, taakkunanngalu ataaseq qinnuteqaatinut 14-inut agguataarlugit 345.115 kr.-nik, aappaa qinnuteqaammut ataatsimut katillugit 6.969 kr.-nik, pingajuallu qinnuteqaammut ataatsimut katillugit 2.589 kr.-inik tunineqarput.

Naatsumik oqaatigalugu konto pineqartumit tapiiffigineqartartut tassaanerupput saqqummersitsiviit ikittuinnannguit, immaqaluunniit oqarluaannaraanni saqqummersitsiviup ataasiinnangajassuup konto pineqartoq kisiinnangajammi aningaasanik aallerfigisalersimavaa. Nipilersortatut qinnuteqaraluartut itigartinneqartarsimapput, naak oqaasertaliunneqarsimasoq aqutigalugu periarfissinneqarsimagaluarlutik.

Tamanna ajorpoq uggornarpoq allanngortariaqaleraluarpoq. Kontop pineqartup siunertaa anguniagaalu malinneqanngitsutut ippoq, aappaatigullu aamma siunertaa anguniagaa, toqqammavimmigut nutaanngippallaalerpoq, piffissanngorporlu allannguissamut nutarterisoqarnissanullu.

Naggataatigut; Oqaasissarpassuaqarnaraluaqisoq, piffissaq tunniunneqartoq killeqarmat; Aqqalu C. Jerimiassenip siunnersuutaa taama isikkoqartillugu itigartipparput, uagullu allannguutissatut siunnersuutivut marluk eqqartugassanngorlugit, Kulturimut Ilinniartitaanermut Ilisimatusarnermut Ilageeqarnermullu ataatsimiititaliamut ingerlaqqinnissaat akueraarput.

Qujanaq

Peter Olsen
Inuit Ataqatigiit